

道光戊申秋鐫

牧令書

楚興國李煒校刊

牧令書卷二

政畧目錄

筮仕

潘杓燦

居官寡過錄

胡衍虞

候補

何士祁

補缺

何士祁

到任

何耿繩

嘗試語

王植

諷風俗

袁守定

舊俗所便勿遽改

袁守定

學治臆說

汪輝祖

勤職

汪輝祖

越中從政錄

王鳳生

作吏管見

朱

作吏要言

葉鎮

諮詢地方利弊諭

陳宏謨

諮詢民情土俗三十條諭

陳宏謨

詢訪各廳州縣地方情形札

程含章

爲宰議

楊名時

送黃張二令

蔡世遠

答門生王禮圻問作令書

袁枚

議州縣不必設副官鄉官疏

鄂爾泰

陞遷

潘杓燦

牧令書卷二政畧

安肅徐 棟致初輯

治非一端而已自始至終由大而小必先胸有成模而後可
次第從事不然措施無準內外失宜操刀者傷矣蓋治原其
全體政畧則大用也

潘杓燦

字象承號月山浙江
錢塘生員有未信編

筮仕

服官有本末固必先心術而後儀文然出疆載贄入國問禁古人
總爲行道計耳倘動止乖離酬應舛錯何能優優敷治乎故始進
不可不慎也述筮仕

掣籤已定則此州縣之事乃身任之事必急急咨訪使到任之日有成竹於胸大約以錢糧丁口爲主知錢糧之輕重便知地土之肥瘠知丁口之多寡便知地方之大小其應付繁簡支用奢儉俱開載賦役全書各縣全書俱達戶部須覓來抄錄以備查考雖本處接役有特來投遞者然未來當豫計也

查全書

四方之人多聚京師先須訪尋本處人咨詢風俗便知此方應如何料理不但可以豫先準備亦可因其所需以延助理之客

察風俗

新官入境乃士民觀聽之始舉動不可不慎已入境且離城擇公廨寺宇居停家屬着吏房開具上任叅謁先後起數以便臨時隨答竝問上任舊規接人恒禮上任過再令家屬進署

入境

交代印信各處規矩不同有前官先送府庫新官親自見府尊領
者有差官吏送至前途者有公座時當堂交送者若府廳掌印必
親往衙門領印悉着吏書先具儀注依例而行開印時驗四角篆
文并嵌補缺損印文明白模糊驗真封收

受印

須知乃爲官要領令各房造冊呈遞務要照款詳開如吏房要造
本衙門各房吏幾名書手幾名所屬官吏幾名有無懸缺陞遷署
印及泊中貢監舉進已經投供候選者有無丁憂事故未報戶房
要造該徵夏稅秋糧若干內中起運若干存留若干各項丁差若
果額辦歲課若干雜項錢糧若干及何月日徵收是何月日起解
何爲及期何爲過限自我到任以前某項拖欠若干某項完結若

千禮房要造應祭壇宇幾所有無先賢祠墓古跡與忠臣烈士及
現在義夫節婦孝子順孫并恬退隱逸向時禮數褒異者幾人鄉
宦見任幾人致仕幾人舉人貢監生員若干其接見常規如何境
內寺觀若干所僧道若干人兵房要造巡兵若干憑何冊籍查考
本衙各衙皂快若干有無重役白役壞事革逐弓兵若干名守何
關隘何處巡司地方緊急舖兵急遞何處地當孔道何處偏僻空
閒驛遞馬匹若干船隻若干作何差遣刑房要造在監囚犯幾名
看監吏卒幾名 欽憲件及本衙門詞訟已結未結從實開具以
便完繳每年須解罪贖若干工房要造歲辦軍需藥械幾何各衙
門公廨及舖舍橋梁幾所有無倒塌去處應否修理察院分司倚

桌牀橙鋪陳幾件作何置辦應付本衙工作如何使用如此造冊

講究或有利弊可以興革

看須知

到任三日早謁 文廟次啟聖祠次兩廡次名宦鄉賢祠畢升明

倫堂抽籤講書列等賞紙筆墨亦有不升堂講書者卽往各壇行

香并看養濟院就望鄉官或答寅僚

視學

到任後下監取出監簿逐項查點更問有無在外羈候如有應釋

放者卽與釋放應保候者卽與保候應鎖押者卽與鎖押檢其床

褥試其稿鑰巡視周圍牆垣逐一區處

看監

旣到任三日例須申繳文憑將文憑細加檢點備文申府轉繳藩

司其申文要用脚色

繳憑

初任之官上下情性未洽非文告曉諭何由通達况立法貴嚴於始得民務審於初凡一應應更應守宜行宜禁事件俱要出示以便遵守句語但要明白簡切勿炫詞華

發示約

爲申飭堂規以一遵守事照得本縣授任茲土甫經下車除一應利弊尙俟漸次飭行外所有堂規事理先應列款申飭爲此示仰書役人等知悉務照後開條例自愛凜遵毋得踰越致干罪戾須至堂規者

堂規

一每日聽內衙擊點七聲外發頭梆各房吏書齊集公所辦事聽擊點五聲外發二梆各房吏書齊至宅門靜聽唱名依次伺領僉押聽擊點三聲外發三梆候再擊點三聲門皂請匙

開門值堂門子并承印書辦進衙跟隨本縣陞堂攬越紊亂者究責

一公堂係法紀之地自宜清肅凡遇陞堂理事皂快站堂把門不得擅放閒人潛入卽一應書役非奉公務亦不得上堂挨擠窺探混亂違者究責

一本縣日行牌票該房具稿後填某書承行投入僉套先一日送衙聽候裁奪放行次早發出膳清字眼務宜端楷如有潦草洗補者究責

一凡欽部憲件各房照例承行或應申覆或應申報務宜卽速料理如有玩忽沉閣以致違限不結者究責

一奉各上司批詞并自理詞訟所應拘提人犯悉以路之遠近
定限解審以便結卷歸農如有延緩賄闇者該房與廳差一
并究責

一審理詞訟凡拘到人犯務於早堂具單點名照掛牌聽審如
點過人犯該差私行賣放臨審不到者定將該差按名加責
補拘另審

一遇審理事件止用該承一名錄寫口供門子二名站立執簽
唱名餘役不許擅上法堂并攙越用刑違者究責

一本縣六房書辦共置卯簿一扇分填各房姓名以便朔望
名畫卯按簿挨承事理如有點卯不到并卯簿無名攙奪

行者究責

一凡聽差人役各置板籤一枝上填本役姓名貯筒送衙以便掣填差使如該承擅自填差送僉者究責

一凡發出牌票承發書辦總立號簿一扇每吏書三頁前註姓名後列某日承行事件每遇三六九日送衙查銷如有違限不結者俱於午堂比責

一本縣大門儀門宅門每日輪派皂隸一名常川把守凡有公務并進見人員各役依次傳報致使閑人竟至宅門窺探者究責

一本縣係倉庫重地防守宜嚴一應直宿更夫支更守宿不得

怠玩如有不到併喚閑人替代者究責

示諭把頭門皂隸及鼓樓更夫知悉每晚起更以後卽行封鎖不許縱放一人出入其更夫支更務要鐘鼓分明輪更交替如遇有查點不到違怠熟睡者定行重責不恕

頭門告示

示諭把二門皂隸知悉照得本縣升堂凡一應閑雜人等不許在外圍立擠擁窺探該班快手在於二門外伺候聽差遇有

上司來差到門俱令暫止先行稟知俟本縣堂事完畢傳見如應卽見者亦俟傳進見敢有擅自放入定將值日門役責革不貸

示諭二門

示諭把守宅門皂役知悉照得川堂逼近內衙止許門子二名

在外聽候呼喚如各吏書遇有急緊公文稿案許擊梆從轉斗
內投進稟請簿籍文卷俱要寫具稟單以憑查發不許口請務
要高聲傳話不許低言細語事完卽出其餘人役不許站立後
堂竊聽至於非係衙役更不許放入一人如違把門人役重責
革役

宅門告示

爲曉禁事照得本縣衙門乃錢穀刑名所係例應關防置立轉
斗凡封門之後一切文書公務俱從此傳稟實爲出納之咽喉
杜私之關鍵也豈容閒人擾混除司斗一人之外敢有近前窺
探者定加研究弊露重處如司斗之人遠離致有疎漏亦卽加
責逐換斷不少假

轉斗告示

爲嚴防倉庫事照得倉庫乃錢糧重地看守宜嚴若混雜疎忽
大干法紀合行禁約爲此示諭承管倉庫吏書庫夫知悉嗣後
每日止許承管吏書在內聽候呼喚不許縱放一應閑雜人等
進出遇晚務要吏書庫役親身上宿不許僱倩匪人頂替如違
各責三十板不恕

倉庫告示

爲申嚴監獄事照得囹圄重地干係匪輕提牢官吏每日清晨
督率禁卒打掃潔淨毋使穢氣蒸人致起疾疫如遇犯人有病
卽刻稟報撥醫調治犯人家屬往來盤問的確方許見面至於
一切違禁之物不許藏混入內尤不許凌虐犯人索詐送飯犯
屬至晚因其罪之輕重枷鐐牢固不得疎虞務要內外巡邏

鑼響亮不許酗酒熟睡偷安慢事敢有查點不到及僱替應役者定行重責四十板斷不輕恕

監獄告示

爲申嚴門禁事照得城垣重地門禁宜嚴啟閉自有定時盤詰更宜加密理合出示嚴飭爲此示仰把門兵役人等知悉嗣後日則盤詰往來如有面生可疑之人禁止入城至於騎馬佩帶腰刀弓箭者務必盤問來歷赴縣投知卽應入城者將掛刀弓箭暫寄門首單騎入城事畢出城帶回不許擅自放進夜則依時鎖閉支更人役務要梆鑼響亮鐘鼓分明週城巡查按更輪流交替不許片刻懈怠偷安務使盜賊肅清士民安枕敢有故違定依法重處不饒

城門告示